

72539

名 名
宦 賢
傳 傳

新
絳
縣
志

卷
四

名賢傳

名賢之出所以綱紀羣倫映輝山川絳之舊志於春秋時晉之人物搜輯靡遺據編者之意則謂晉都於絳凡仕於絳者皆絳人也竊以爲未允夫仕於絳非產於絳也假令文翁守蜀遂入益部耆舊之中朱邑思桐便與廬江小史並列有是理乎今於諸賢確係絳產者編入名賢傳內非絳產者均行裁汰以免借材之誚且彼諸賢事蹟大都在春秋三傳內其書爲人人所必讀其姓名爲人所經見即不載入方志亦不虞其湮沒也作名賢傳

周

韓 厥韓萬元孫晉景公時爲司馬鞍之戰執齊逢丑父以獻趙

新絳縣志

卷四

名賢傳

一

氏既滅厥言於公曰成季之勳宣孟之忠不可以無後於是復立趙武而反其田簡王元年晉人謀去故絳居郇瑕厥謂不如新田公從之樂書等將弑厲公執厥厥辭曰二三子不能事君焉用厥也後代樂書爲政卒謚獻

韓無忌厥之子悼公以其鎮靖與荀家荀會樂驥並爲公族大夫使訓卿之子弟及厥告老將立之無忌有廢疾辭請立弟起公謂無忌仁能長公族大夫卒謚穆子襄平嗣職

韓 厥起之子無忌弟也無忌稱其賢讓立之悼公使佐上軍靈王八年諸侯伐鄭起與荀偃將上軍鄭人行成平陰之役起與趙武以上軍圍盧還自沂上魯襄公賜以三命之服二十五年

聘於周王使請事對曰晉士起將歸時事於宰旅無他事矣王曰韓氏其昌阜於晉乎二十六年宋向戌欲弭諸侯之兵以告晉起言而許之後聘魯觀書於太史氏見易象與魯春秋曰周禮盡在魯矣聘鄭起有玉環其一在鄭商起買諸賈人子產不可起遂辭玉列聘諸國賦詩贈答無失禮後代趙武爲政卒謚宣子須

羊舌大夫有友爲申生尉申生被讒或勸之行曰不可違命不孝棄事不出子其死之其少也恭而順心有恥而不使過宿其爲大夫也悉善而謹其端其爲與尉也信而好直其功至於其爲容也溫長而好禮博聞而時出其志此羊舌大夫之行也孔子

新絳縣志

卷四

名賢傳

一一

云

羊舌職羊舌大夫子簡王十八年爲晉中軍尉佐悼公以職之聰敏肅給也故使之

羊舌赤字伯華職之子職卒悼公使代父任食邑銅鞮其爲人之淵源也多聞而難誕內植足以沒其世國家有道其言足以治無道其默足以生蓋銅鞮伯華之行也孔子云

羊舌肸字叔向職之子赤之弟靈王二十七年諸侯之大夫盟於宋宋公享之晉趙武爲客楚子木與之言弗能對叔向侍言子木亦不能對景王十年鄭人鑄刑書叔向使詒子產書曰國將亡必多制其此之謂乎昔韓宣子之適楚也楚人弗逆公子棄

疾及晉境晉侯將亦弗逆叔向曰楚辟我衷若何效辟乃逆之見單子視下言徐決其將死聞魯昭公之不感而知其失國其言多驗事悼平昭三公幾四十年以德義輔石以博識媻禮聞列國孔子稱爲古之遺直娶於申公巫臣氏生伯石黨於祁盈而助亂殺之遂滅羊舌氏

唐

敬君洪累功封黔昌侯以屯營兵守元武門隱太子之死與中郎將呂世衡呼而進皆戰沒

裴 濯聞喜縣人裴琰之子徙居絳州舉明經遷監察御史時崔湜鄭愔典吏部坐姦贓爲李商隱所劾詔濯按訊濯執正其罪

新絳縣志

卷四

名賢傳

三二

天下稱之睿宗造金山玉眞二觀早甚役不止濯上疏諫開元中累遷吏部侍郎甄拔士類爲多擢吏部尙書改太子賓客卒諡懿祀鄉賢

譚 忠祖琮天寶末令內黃殉城忠豪健喜兵范陽節度劉濟與二千人障白狼口後將漁陽軍留范陽元和五年伐趙魏博節度田季安欲先捍之忠時使魏入語季安曰是引天下之兵也不如悉甲壓境陰遣趙人書使遺魏一城魏得持之奏捷則霸基安矣季安曰善遂用其謀忠歸燕謀欲激燕伐趙曾濟合諸將議忠疾對曰天子必不使我伐趙趙亦不備燕濟怒擊之使人視趙果不備燕後一日詔果來使無伐趙濟召問何以知之

忠曰此潞盧從史計以燕販忠也濟乃下令軍中曰五日舉出後者醢以徇遂屠趙饒陽束鹿十四年趙人獻城冬誅濟忠因說濟弟總曰凡天地數窮合必離離必合河北於天下相離六十年矣此亦數之窮也必與天下復合總泣且拜曰吾心定矣明年春總去范陽卒於趙思護喪西數日亦卒忠官至御史大夫弟憲安次令祀鄉賢

宋

薛奎字宿藝舉進士性剛不苟合遇事敢言又能知人善任以嚴治京師以寬治蜀皆以最稱遼使蕭從順請見章獻后奎獨以理折之乃止章獻后欲以袞冕謁太廟奎力陳其不可后不

新絳縣志

卷四

名賢傳

四

能奪爲改服章獻崩上泣謂羣臣曰太后頃數引其衣若有所屬何也奎曰其在袞冕也服之豈可見章聖於地下卒以后服歛上嘗數宴大臣奎諫曰天下誠無事而大臣數被酒無威儀非所以重朝廷也上嘉納焉累官至龍圖閣學士參知政事卒謚簡肅子直孺謹飭好學早卒以弟子仲孺嗣廕將作監主簿累遷太子右贊善大夫殿中丞兄睦有隱操以恩例補右班殿直居頃之棄去不復仕以德行文學爲鄉善人弟塾以恩例官內殿崇班兄子長孺尙書虞部員外郎知絳州軍事良孺國子博士俱歐陽修誌表其墓祀鄉賢

孟宗政字德夫絳州人父林從岳飛至隨州僑家焉宗政幼豪偉

有膽略開禧二年金將完顏董犯襄郢率義士據險邀擊奪其輜重宣撫使吳獵奇之補承節郎棗陽令京西路分趙方吳柔勝皆薦其才轉秉義郎京西鈐轄駐襄陽嘉定十年金犯襄陽棗陽方檄宗政節制神勁報捷忠義三軍與統制扈再興陳祥分三軍設三伏蹀血以戰金兵敗走尋報棗陽圍急午發峴首遲明抵棗陽馳突如神金人大駭宵遁方時帥京西差權棗陽軍初抵事一愛僕犯新令立斬之軍民股栗築隄積水修治城堞簡閱軍士十一年金帥完顏賽不圍城宗政與再興合兵角敵歷三月大小七十餘戰身先士卒金人戰輒敗乃周城開濠四面兵列濠外以絢鈴自警鈴響則犬吠宗政厚募壯士乘間

突擊隨方力拒隨守許國援師至白水率諸將出戰金人奔潰賜金帶轉武德郎十二年金帥完顏可擁步騎傳城宗政囊糠盛沙以覆樓棚列甕瀦水以隄火募礮手擊之一礮輒殺數人金人選弩子手二千擁雲梯天橋先登又募鑿礦石工陷城運茅葦直抵圍樓下欲焚樓宗政先燬樓掘深阬防地道瓶戰棚防城隕穿窬才透即施毒煙烈火鼓鞀以熏之金人窒以濕氈析路剝土城頽樓陷宗政撤樓益薪架火山以絕其路列勇士以長槍勁弩備其衝距樓陷所數丈築偃月城袤百餘尺翼傅正城深阬倍仞躬督役五日成金兵披厚鎧氈衫鐵面而前又濕氈濡革蒙火山覆以水雪擁雲梯徑抵西北圍樓登城中軍

以長戈舂其喉殺之敢勇城軍自下夾擊金兵墜死燎燄金將
於後拒馬揮刀迫令前自斫至夕死傷踵接梯橋盡燬俄乘順
風渡濠飛脂革燒戰棚宗政激將血戰凡十五陣金兵死者千
餘弩子手十死七八射其都統殪天反風金人礮愈急會王大
任領銳卒一千轉門入城遂賈勇入金營自晡至三更金人橫
尸遍地訛可走奪銅印十有六獲輜重牛馬萬計升武功大夫
兼閣門宣贊舍人重賜金帶制置司以湖陽縣迫金境檄宗政
圖之一鼓而拔燔聚夷砦俘掠以歸金人自是不敢窺襄漢棗
陽代許國爲荆鄂都統制仍知棗陽宗政以迫濠而陳迺於西
北濠外瀦水爲瀦以限騎中原遺民來歸者萬數發廩贍之給
新絳縣志

名賢傳

六

田剏屋與居籍勇壯號忠順軍俾出沒唐鄧間威振境外金人
呼爲孟爺爺俄病卒轉右武大夫團練使防禦使宗政爲將有
功怨必賞有罪親必罰好賢樂善未嘗學兵法而暗與之合死
之日邊城爲罷市慟哭祀鄉賢

孟 琪字璞玉宗政子也僑棗陽金人犯襄陽駐團山琪料其必
窺樊城獻策宗政由羅家渡濟河宗政然之翼日諸軍臨渡布
陣金人果至半渡伏發殲其半宗政援棗陽常父子相失琪望
敵騎中有素袍白馬者曰吾父也急麾騎軍突陣遂脫宗政以
功補進勇副尉轉進武校尉理宗特援忠翊郎又辟京西第五
副將權管神徑左右軍統制初宗政招唐鄧蔡壯士二萬餘人

號忠順軍命江海總之衆不安制置司以琪代分其軍爲三衆
乃帖然紹定初剋平堰於棗陽建通天槽溉田十萬頃軍民分
屯收五十萬石二年升京西第五正將母憂起復京西兵馬鈐
轄棗陽軍駐劄仍總三軍六年元逼蔡檄琪戍鄂討金唐鄧行
省武仙破其九砦武仙走追及之仙與五六騎奔降其衆七萬
人獲甲兵無算還軍襄陽轉修武郎鄂州江陵府副都統制元
遣王楫約攻蔡琪請以二萬人行端平元年正月城中絕糧盡
琪帥師向南門列雲梯令諸將聞鼓則進萬衆兢登大戰城上
降其丞相烏古論栲栳殺其元帥兀林達執參政張天綱以歸
得金盞寶玉帶金銀印牌有差還軍襄陽擢建康府都統制二

年授主管侍衛馬軍司公事駐黃州朝辭上問恢復對曰願寬
民力蓄人材以俟機會問和議對曰臣當言戰不當言和賜賚
甚厚兼知光黃州節制黃蘄光信陽四郡軍馬元兵攻蘄州解
其圍又攻襄陽琪往節度破砦二十有四還民二萬嘉熙三年
累授樞密都承旨制置使兼知鄂州初詔琪收復京襄琪謂必
得郢然後可通饋饟得荆門然後可出奇兵由是發兵深入所
至以捷聞拜武甯軍節度使四川宣撫使釐蜀弊政爲條頒諸
郡縣淳祐五年以職事修舉轉行兩官許回授琪至江陵登城
嘆曰江陵所恃三海不知沮洳有變爲桑田者敵一鳴鞭即至
城外乃修復內隘十有一別作十隘於外障沮漳水繞城北入

於漢三海遂通爲一渺然巨浸及襄陽軍亂行省范用吉密通降欵琪白於朝不省嘆曰三十年收拾中原人今志不克伸矣病革乞休致卒於江陵府治是月朔大星隕境內聲如雷卒之夕大風發屋折木贈太師封吉國公謚忠襄廟曰威愛琪忠君體國可貫金石名位雖重惟建鼓旗臨將吏面色凜然退則焚香掃地隱几危坐若蕭然事外遠貨色絕滋味其學邃於易著警心易贊亦通佛學自號無庵居士兄璟鎮武昌弟瑛璋並以軍功顯

金

李愈字景韓正隆間進士慷慨尙志節大定間典解郡明昌中

新絳縣志

卷四

名賢傳

八

召授曹王傅從王賜宴北部還奏諸部貢馬止可委招討司受於界上量給迴賜省費以廣邊儲擬沿邊創設重鎮十數田給於軍者許募漢人佃種不必遠輓而兵自富強上嘉其忠尋擢河南路提刑使以最著改河平軍節度使遷刑部尙書奏除陳言洩漏科罪舊條以廣言路上將巡幸長樂以屢諫乃止復授河平軍節度使改知河中府事致仕卒謚清獻所著狂愚集二十卷祀鄉賢

梁

襄字公贊父定早亡養於叔父寧性穎悟日記千餘言大定三年進士令淳化有善政察廉升慶陽府推官召爲薛王府掾時世宗將幸金蓮川上疏極諫世宗納之遂罷行襄由是以直

聲聞擢禮部主事太子司經選爲監察御史尋轉中都路都轉
運戶籍判官未幾遷通遠節度副使以喪去服闋授安國軍節
度副使同知定武軍節度使避父諱改震武軍太常卿張暉曹
州刺史段鐸薦襄學問賅博練習典故可任禮官轉同知順義
軍節度使事歷東勝州陝州刺史終保大軍節度使襄長於春
秋左氏傳至地理氏族無不該貫自蚤達至晚貴膳服常淡薄
人士雅欽之祀鄉賢

梁持勝字經甫保大軍節度使襄之子多力善射泰和六年進士
復中宏詞科累官太常博士遷咸平路宣撫使經歷興定初宣
撫使蒲鮮萬奴有異志欲棄咸平持勝力沮萬奴怒杖之上京

新絳縣志

卷四

名賢傳

九

行省太平與萬奴通謀口稱持勝忠署左右司員外郎而焚毀
上京奪元帥承充軍持勝與咸平治中裴滿賽不萬戶韓公恕
約殺太平復推承充行省事事泄俱被害贈中順大夫韓州刺
史

元

孔錦山字晉望雄勇多智略善騎射初襲父爵千夫長從征累有
功戰於茶山時墜馬騰上者三督安撫嘆曰真奇士也世祖賜
錦衣弓矢鞍勒諭以回跖之事錦山對曰人惟爲善則美名自
臻累陞礮門等處鎮守萬戶子禿魯卜有父風次也先不華俱
礮門等副千戶佩虎符祀鄉賢

張仲儀字伯威由絳州學正入翰林改杭州路總管府判官稱能吏海寧潮溢沒民田廬仲儀禱於海神水隨退遷江西行省左右司都使歲饑民將爲變仲儀單騎出撫之民感泣散去言於省臣發粟賑濟擢亞中大夫撫州路總管卒年六十九封正平縣男明宋濂銘其墓祀鄉賢

姚天福字君祥讀春秋通大義辟懷仁丞至元中召拜監察御史條奏宰相阿合馬罪二十有四召廷辨天福枚數之至於三氣沮色喪上曰此三者罪已在不宥因目天福曰巴兒思臣下有違太祖之制干朕之紀者汝抨擊之無隱廷臣皆震悚巴兒思者謂不畏強悍猶虎也帝仍加厚賜天福曰言臣分也受賞非

分也卒不受時御史臺置二大夫天福曰古稱一蛇九尾首動尾隨一蛇二頭不能寸進今臺綱不張有一蛇二頭之患陛下不急拯之久則紊不可理大夫李羅遂以年少引退按行畿輔時監敢普得罪御史按之不服天福廉得其死罪十有七俄以宥免經臺門大詬急捕之檢行囊得賄侍御史按兀失納赦免狀明日陞奏上曰彼七死猶赦汝欲何爲天福對罪十有七條赦七留十餘誰歸上悟戮敢普而斥安十二年罷按察司天福曰是司之設所以廣視聽虞非常慮至深遠不但繩有司已也大夫王昔帖木耳駭曰微公言幾失之夜入帝臥內奏其言帝大悟詔復立阿合馬益不悅左遷衡州路同知不就後歷河東

淮西湖北諸道按察使善辨疑獄大德四年拜參知政事大都路總管兼大興府尹六年卒年七十三謚忠肅祀鄉賢

尉遲天澤仕金爲庫官郡王帶孫拔絳州澤在俘中道見兵死者輒涕泣收瘞之帶孫令佩金符授霍州御衣局總管子鼎仕至潞州知州

尉遲德誠字信甫歷官太子率更丞遷家令司丞仁宗以爲謹恪常賜酒帛得侍左右數薦士出則未嘗語人廳事前有粟苗不種而萌偶出一莖雙穗衆以爲嘉禾遷河東山西道宣慰司同知擊姦吏寬稅歛上計入見上方食賜以餽餘擢工部尙書未拜改陝西行臺治書侍御史遷京畿都漕運使拜遼東道肅政

新絳縣志

卷四

名賢傳

十一

廉訪使上疏言事曰勞諸王以懷其心防出入以嚴宮禁立諫官以遠讒佞崇科舉以求人才立常平以備荒年汰僧道以寬民力舉賢良以勵忠孝抑奢侈以厚風俗及拯鈔法裁冗官等事未報卒年五十三祀鄉賢

韓亨甫由中書省掾授監察御史後調東平路總管至正間毛貴作亂守城死節贈陝西行中書參議祀鄉賢

李思敬字君讓由中書省西曹掾累仕至肅政廉訪使以孝廉稱祀鄉賢子僎有文學授諭社縣尹後至肅政廉訪副使孫士林亦貴時名其里曰登瀛

明

高 鐸字鳴道從李彥英遊與陳行義共朝夕學益進洪武甲子鄉試第一甲戌進士累官刑部侍郎調僉都御史舉師李彥英爲本州訓導舉友陳行義知蘇穎二州築留都城開三山街奏遷金城驛爲侯馬驛卒贈尙書祀鄉賢

張 徽永樂戊子舉人任陝西永壽縣知縣廉介自持秋毫不苟取鄉里稱之祀鄉賢

蓋 暖宣德乙卯舉人任陝西靜甯州知州莅政廉能有古循吏風靜甯入名宦祀鄉賢

韓 英正統戊午舉人任泗州同知多惠政施藥活病人收瘞枯骨民遭水患力拯之吏部考最祀鄉賢

新絳縣志

卷四

名賢傳

十一

郝 矩由歲貢任工部主事奉命修高郵湖岸四百里有碑記載其功

陶 銓字文衡正統乙丑進士授行人奉命至太原會中官王振亦至聲勢煊赫銓不一往謁歷陞陝西參議和平愷悌士民戴之致仕歸構小軒曰一閒與鄉里耆碩爲九老延齡會有盜持炬入室見惟敝書舊衣嘆息去有司欲窮治銓曰彼以貧來值吾貧而去奚究焉其溫厚類如此祀鄉賢

范 忠景泰間副貢爲樊山府教授天性質直輔導有方時郡王好騎臨險苦諫止之

李 縑瑛孫景泰癸酉科舉人歷任彭縣洛南伏羌知縣所至以

廉介稱

劉 預麟遊知縣有惠政士民戴之

陶 璽字廷用銓第四子天順甲申進士性通敏廉潔初授戶部主事遷員外督德州倉儲先是郟城所輸未足額當事者積其粟於河岸而逮繫其官吏三年猶未結璽至廉得其狀即曰釋之自是勸輸恐後終其任無少逋者薊州民田五萬餘頃爲豪右所據璽奉命清查悉得歸民齎帑金餉遼左榆林軍分給公平軍士胥悅山陝歲洊饑民多流移有司徵逋賦甚急璽奏請蠲之遷郎中出爲長蘆運使總攝 權愈勵清操前使者藏金署井中求得之悉付還人稱君子祀鄉賢

新絳縣志

卷四

名賢傳

十二

劉述宗成化辛卯科舉人爲楊州府通判居官以廉介稱

王 琪成化甲午科舉人爲崇府長史淹貫經史人多服其勤敏
閻 重成化甲午科舉人官至靜寧州知州勤慎慈愛士民德之
姚 達字文達成化丁酉科舉人授宜川訓導條約嚴明教人以

正心誠意之學士子皆有所矜式比三年歲大饑使子偉抵家携兄姪至宜川資俸以養九年秩滿改宣府萬全衛訓導諸生素務弧矢而輕詩書達請於當道始置學田進諸生講經史及孫吳書勤懇忘倦未幾京闈中式二人襲職至參遊三人指揮千百戶三十餘人時諺曰邊陲文武臣多出先生門秩滿士大夫製詩留別諸生泣送百里外陞考城教諭條約如宜川辭歸

不允又陞彰德教授尋以疾致仕居官三十載善育人人才多所成就其於功利泊如也祀鄉賢

毛 憲成化丙午舉人性孝友博涉經史由祥符訓導擢孔顏孟三氏教授轉西安府學教授師道尊嚴言行不苟嘗曰士子讀書處事只求一個是令諸生宿號舍夜行以巡之其貧而好學者必捐俸助給一時陶成最多陞韓府長史今祀鄉賢子錐舉明經清河訓導

范 通成化丙午舉人歷任唐縣齊河縣知縣廉介有政績

韓 重字淳夫英之子成化戊戌進士性通敏貌魁梧初授禮科給事轉本科都給慷慨敢言劾方士李省孜交結太監梁芳等

新絳縣志

卷四

名賢傳

十四

左道要寵芳降南京御用監閑住逮省孜錦衣獄憲宗寵辛萬妃服物多擬於后疏爭之憲宗怒杖於廷明日復諫如初從之番僧法王領占竹等倡西番之教濫膺爵賞擅作威福重劾奪印勅用發遣去出爲陝西參政遷右布政使清軍務督馬政以最擢應天府尹廉敏益著降旨褒諭補順天府尹遷右副都御史巡撫遼陽論鎮守太監梁圮貪暴不法罷之尋改巡撫湖廣題請計處運糧以便軍民併屬設官以安地方二疏甚偉時貴州都勻作亂公運餉剿平降勅諭獎擢南北兵部侍郎進南京工部尙書疏請止不急工役忤劉瑾矯旨羈滯揚州年餘疽發背卒瑾誅賜祭葬如例其事績詳明朝典則王弇州中官考

明朝大政紀山西正祀考諸書嘉靖間知州許用中申請立祠
專祀今祀鄉賢曾孫科貢士任濟南通判廉介有祖風

陶 琰字廷信銓子成化辛卯鄉試第一辛丑成進士授刑部主
事決獄稱平累遷右副都御史巡撫河南廉介絕俗每飯一蔬
人呼青菜陶黜賊吏數人屬吏震懾遷刑部侍郎適遊擊徐謙
誣奏御史李高謙逆瑾黨也賂瑾欲中高琰承旨往覈據法直
高瑾怒矯詔下獄罷去瑾怒未已復罰米四百石瑾誅言官交
薦起左副都御史總都漕運單車至鎮廉得諸幸豎豪猾者悉
治以法權勢斂手中使敬憚罔敢需索會河北姚源諸賊騷動
承命巡視進右都御史簡任惟允調度周詳北賊殄滅西賊聽

新絳縣志

卷四

名賢傳

十五

撫次年復犯大破賊巢餘黨悉平捷聞賜璽書金綺進俸從一
品寧紹瀕海颶風漂溺無算躬按其地發帑金賑濟仍築堤自
蕭山抵餘姚凡五萬餘丈乃奏設兵備道守要害遂城開化常
山遂安蘭谿諸邑境內以靖復命總督漕運引疾歸疏七上乃
得請世宗初起故官凡三督漕政軍民懽聲雷動擢工部尙書
詔侍經筵轉南京兵部尙書歲饑移檄大賑全活甚衆裁革宦
官快船官民無擾事皆先發後聞乞休疏十上乃得請詔加太
子太保賜乘傳歸行李僅三竹笥時稱陶三杠歲時命有司存
問年八十四卒上聞悼念諭祭九壇遣行人嚴寬建塋贈少保
謚恭介立祠專祀其事績具載名臣錄山西正祀考直隸廉平

錄諸書記鄉賢

閻珪安元坊人成化癸卯舉人通州學正九年陞西安府教授劉儲秀杜某時爲童生珪見而奇之兩生貧杜尤甚乃延之學與子宗舜聯榻親爲課業資以饗殮仍爲杜完室陞國子博士秩滿歸賃宅而居劉爲督學杜爲方面相繼顯達珪故即窀而杜始聞臨塚致祭哭之慟蓋恩誼所感也祀鄉賢

梁榮成化間副貢昌邑主簿性篤厚廉潔運糧有羨餘悉歸之公無纖毫入己

陳希良安元坊人洪治戊午舉人性嚴毅爲真定推官定州豪楊錫以產故控於巡撫巡撫委希良鞠之錫因以錦衣寇栩太監

新絳縣志

卷四

名賢傳

十六

張雄書求庇希良不受繩以法栩與雄憤甚嗾錫訐希良陷於獄竟死嘉靖改元州守李文潔以狀聞曹於汴爲之贊真定入名宦祀鄉賢

楊澤洪治辛酉科舉人歷任通州隴州知州爲人剛毅果敢尤善知人

李應奎字闡道孝義坊人宏治甲子科舉人授平山知縣開誠布公與民相信凡八年陞陝州知州有楊昆父子含冤繫獄奎得其情力辨之巡按執不可辨益力竟忤坐罷巡按以他事罷昆冤亦白平山入名宦祀鄉賢

范昕字晦之正德癸酉科舉人任趙州世宗幸楚過趙祇事中

節駕過次日行宮災大吏將移罪散僚昕不聽慨然自認及爲承天同知巡按包某委勘陵監家人違法狀昕如法議報陵監誣奏巡按及昕並逮獄昕在獄言如平時包以鐵漢擬之謫戍南海蒙詔赦壽九十二卒萬曆中晉階四品祀鄉賢

韓 瓚字宗獻安元坊人正德己卯科舉人由教諭遷藍田令政廉平陞漢中通判會妖人劉列謀不軌瓚監軍督率有方斬首五十餘級生擒百餘人獲僞詔及妖書欽勞金幣陝西通志列名宦起補保定陞濟甯知州節愛有聲再起補通州兩院俱才之京兆憎其傲調寧州致仕祀鄉賢

陳 韜字文智歲貢任萊陽縣丞正德六年流賊入境率三子及民兵拒賊斬首十五級奪回被掠婦女二十餘口拒守月餘城陷死之長子裴季子槩亦遇害惟次子槩身被數十鎗以救免事聞贈登州府通判諭祭立廟春秋祀之廕子槩入監祀鄉賢

陶 梓嘉靖甲午科舉人任唯州知州遷兩浙鹽運副使去之日士民不忍舍卒於杭輦櫬過唯民哭奠留二日始得歸梓德性溫雅平生無疾言遽色師事呂涇野得身心之學焉

趙 桐字汝陽三林鎮人嘉靖癸丑進士授富平知縣時撰富平志都憲孫丕揚稱其宏闊不羈警敏絕人憐才樂士出於至誠歸田後諸生從遊者衆所著見總目州志曾經纂輯祀鄉賢

周心易字子時站莊人嘉靖丙辰進士授廣平推官性剛明居官

嚴慎執法有聲轉蘇州同知代吳縣審編三日報完升降允當
邑人欽服祀鄉賢

陳栢字子秀桂林坊人嘉靖乙丑科進士性簡靜有執持讀書
體認本旨不喜穿鑿爲文沉着蘊藉不作浮華署昌邑教諭不
携妻子下帷如諸生時遷內黃知縣以節愛爲務不求赫赫聲
民戴之如父母陞戶部主事督儲德州及瓜而卒祀鄉賢

孫光祜字仲篤桂林坊人嘉靖壬戌進士授承天推官陞文選司
郎中歷遷應天巡撫在承天分考鄉闈得蕭良有在選司官惟
其人請託不行在吳當大水後請蠲夙逋無慮數百萬石妖僧
起京口構結甚衆光祜殲厥渠魁餘置不問在蜀故事蜀藩朝

新絳縣志

卷四

名賢傳

十八

賀五叩頭光祜請如制王曰誠如先生言第彰先王之過奈何
祜曰克蓋前愆正在此舉王從之終南京戶部侍郎祀鄉賢
楊守川嘉靖辛酉舉人授富平知縣動履謹飭不妄交一人嚴治
吏胥愛百姓若赤子縣北山產石諸郡縣來採者故事縣代運
之里甲更班焉名匠班歲費數千金百姓苦甚守川申請得均
派民苦乃蘇

張與行字淑用號時奄嘉靖甲子舉人授容城知縣陞滄州行取
擢南京戶部員外轉本部郎中遷慶陽知府調重慶府所至有
惠政會播酋楊應龍叛與行議招撫播人稔與行言不欺願歸
附撫有日矣當道忌其功旋議加兵播平以計左閑住未幾詔

階致仕歷俸二十三年報最數四然亦未竟所用也祀鄉賢
李東暉嘉靖間拔貢博學敦行從遊者甚衆未仕卒人咸惜之
周尙赤嘉靖歲貢鳳縣主簿行誼修潔聞見博洽

衛 聘嘉靖間歲貢蘄州訓導陞河間教諭爲諸生時與代人吳
嘉會善及以貢入京吳居要地招之不往時論高之

因於夏字宗禹隆慶庚午舉人授襄城知縣繩豪勢以法勸民種
樹疏渠備旱轉鞏昌府通判時扯扒溝賊騎擁至公出識者曰
此因爺也遂遁去

許 恩字仁甫桂林坊人隆慶庚午舉人令寧陽創建磚城省民
歲修費無算募民墾荒給牛種逃亡盡復起補束鹿調館陶會

新絳縣志

卷四

名賢傳

十九

潞藩之國道經陶司禮監張誠扈行張東鹿人素重恩嚴約從
者秋毫無犯陞守曹申允歸代擔銀千兩濟寧姦僧匿甥女誣
甥夫殺甥獄成恩視夫非殺人者偵僧得甥而夫寃白陞南京
戶部員外郎尋陞刑部郎中以疾歸祀鄉賢

韓 科重曾孫隆慶間歲貢授濟南通判運糧指揮某貪肆民苦
之科力陳當道斥去陞葭州行橐蕭然庫有羨金三百兩申上
封識之不以一錢入橐也葭久荒招集賑恤不遺餘力陞韓府
長史致仕

王之翰字維藩號清河王莊人萬歷癸酉舉人授膚施知縣以憂
去起補棗陽有爲崔駟筮易林者不吉翰曰孔僖不辭臨晉翰

乃辭棗陽乎稅監陳奉欲開青山礦翰曰青山實逼顯陵母得輕洩王氣奉怒誣劾之翰聚衆事下兩臺案驗會上計再補崇信奉飛語七上遂削籍抵定州明月店緹騎至翰曰屈原憂楚而沉汨羅死於靳尚吾今爲楚而就檻車死於陳奉何憾也旋下錦衣獄鞠治上謂論報無狀俾貫鎖守鬼栢勿縱舍翰略無惶遽色闕月上悟奉貪毒激變楚民命撫按差官伴送來京欲誅之翰曰楚民活吾可以死矣尋斃獄天啟初贈尙寶司少卿賜祭廕子入監建祠專祀祀鄉賢

陳紹吉萬歷乙酉舉人任保安縣知縣有惠政興學育才補給軍糧至今人猶頌之

新絳縣志

卷四

名賢傳

二十

陳王綱萬歷戊子舉人任束鹿縣知縣多仁政邑人建祠祀之調鎮安縣期年之內興利除弊境內稱治

陶 登字汝高琰曾孫萬歷壬辰進士授齊東知縣公正廉平愛民恤士捐俸金三百葺學甫落成二士脫穎後起者踵相接也別奸戢盜持法尤嚴嘗公出會有群盜謀劫鄉官劉某聞鐘鳴輒警遁又捕寘豪猾田思聖於法百姓手額稱神明丁內艱起補夏津縣夏津古鄆地當八衝之衝長吏久虛訟牒填委又民苦納賦不均豪右率引復自匿而貧無尺土者責逋無寧日登於冠蓋旁午之暇明允折獄案無留牘力刷侵欺飛灑之蠹賦役稱平無何以他事解任未竟所施歸里後每貸粟解衣賙貧

給乏同里舉人陳紹吉卒於官妻孥歸無所依登偕友歛金五百協濟之爲詩簡遠文深醜爾雅尤善作山水小景剡溪半尺簾獲者如拱璧里子弟執經義質難詳疊饜志日昃不遑一時奉爲楷模云祀鄉賢

馮乘雲萬歷間拔貢楊州通判有廉能聲攝兩邑篆裁冗汰苛民咸賴之課最陞武昌同知致仕晉階奉政大夫修正庶尹居鄉溫厚恬雅動履如寒素里人稱之祀鄉賢

梁肇宋例貢授南京留守左衛經歷服闋起北京長陵衛經歷歷任十載未嘗携家居官不亢不卑諸朝士翕然器重之屢膺薦卓陞廣東市舶提舉司正提舉

新絳縣志

卷四

名賢傳

二十一

韓雲字景伯萬歷壬子舉人任徐州改漢中推官再起葭州藏書數萬卷法帖數千卷與相國徐元扈宗伯董思白稱文字交其於星象音韻之學無不究心詩工七言律字慕蘇玉局值流寇四起州城議築銃臺製銃數十置臺上順治六年之變雷轟霆擊守圉增壯實攸賴焉祀鄉賢

王朝麟字海閱萬歷壬子舉人性剛直恥與俗伍博學多能拳勇絕倫任陝西臨洮推官手格大豪擒之元日昧爽緝健訟奸民抵以法境內肅然署渭源嚴剔吏胥諸弊蒞政三月百事就理陞葭州知州致仕歸介然自守不與外事雅善書畫尤工詩祀鄉賢

陳 睦萬歷間歲貢耀州訓導以孝友聞

李宗正萬歷間歲貢太原訓導性剛方敦孝友

盧繼芳天啟間歲貢三泉鎮人領鄉兵禦賊陣亡祀鄉賢

張國紀三林鎮人賈於蘇周忠介以閹禍被逮緹騎勒索忠介金
國紀倡諸賈歛緹賂緹騎毋爲忠介苦也寇亂居堡有謀搯盜
者責以大義仍出己貲周之鄉人由是獲免於難

張貞教庠生時有宗室逼居學宮欲毀墻垣以通馳路貞教與弟
名教力爭之禍幾不測白諸當事事乃平後以貢授淹池訓導
張雲鶴字季鳴有義勇精騎射爲周帥遇吉所知嘗有艷婦私奔
之拒不納

新絳縣志

卷四

名賢傳

一二十一

郝允德字甯尹崇禎甲戌武進士授利民堡守備署平陽參將轉
保定遊擊督師丁起睿檄勦流寇引兵據入北山與賊將鄭五
典晝夜抗敵甲申聞變後仍堅拒誓以死殉時闖寇餘黨將陷
平陽與知府張尙策更番戰守生擒賊將劉貴賊帥牛金星遁
入秦

朱東屏崇禎甲申闖寇陷城東屏謂宗室不可以苟免投繯死遺
書几上曰天下皇皇愧無一長君恩未報親恩難忘惟有一死
以振綱常子養冲養志亦繼死

任惟清崇禎間以貢授甯平訓導端莊嚴肅時舉忠孝節義規切
諸生流寇破城死之甯平入名宦

李如栢四川嘉定州吏目陞王府工正嘉定入名宦祀鄉賢

王曰善字子好號尊生父顯吾授以易弱冠遊庠研精理學愛看喜怒哀樂前氣象九入棘闈輒報罷絕無佗傑不平之感王復丸延爲正心社主講闡明理學崇獎後進士以此爭附之韓雨公誌其墓謂高節似管寧雅量似師德非虛語也歿祀鄉賢子復初揚州府鹽政同知

張四端崇禎間歲貢安邱知縣有政聲祀名宦

清朝

王復初字心一號雲將少從父曰善得爲學大指己復私淑其鄉辛復元不爲剽掠之學由拔貢中順天戊子副榜授古田知縣

新絳縣志

卷四

名賢傳

一三三

以嚴行恕吏民奉法惟謹遷揚州府鹽政同知伸許生之屈贖鄒吏之妻政聲藉甚致仕歸闢嚴正齋日與党冰壑王君棟闡明性學不與外事十舉鄉飲大賓

孫錫齡字遵仰號和菴順治辛卯舉人壬辰進士授宣府推官宣俗剽悍輕犯法有手刃其嫂誣他人者廉得之抵以法又有緣逃人株累者冀以賄免斥之曰枉安用賄不枉又安用賄按之果枉徑釋之以卓異遷監察御史首請纂修孝經衍義丁艱文武官宜解任守制又請革行戶以除商害禁私派以蘇民困巡陝西茶馬請申印烙之制巡長蘆鹽請蠲積欠以引配鹽使豪強不得牟利尋掌河南道累遷通政司左參議以疾歸嘗迎族

兄女於江南俾無至顛沛韓兩公歿而葉落妻至不能掩土亟
賻以葬之

常貞吉字豫二順治辛卯舉人任福建長泰縣以廉能膺卓異耿
逆之變力拒僞職歸里講學著書

李承賜字已夫號肖溪庠生少事安邑曹眞予秦中馮少墟兩先
生安貧積學老而彌篤年七十間辛復元名辛年纔三十師事
惟謹卒年八十有八

馬起雲字仲常庠生讀書懷古抱道自守子中捷舉人安遠知縣
王 桓字君棟運學生性醇厚敦實行所著見著述考

李翀霄字息六拔貢官國史院撰文中書會 敬謹親王以大軍

新絳縣志

卷四

名賢傳

一二十四

征湖南參贊軍前規畫多中機宜釋纍婦一百三十人委署衡
永郴道副使遷上荆南道副使將軍率甲士來鎮抗言令駐城
外五日內築營房八千有奇兵戢而民不擾遷江寧兵備道海
寇軼鳩茲春穀翀霄時署右藩先檄守江浦令城中各杜門乃
偕郎總制梁提督謀潛師長干伏白下龍江之間復出正兵夜
斫賊營而自率吏卒搥金鼓賊驚起伏發踐殺殆盡遷四川按
察使兵後株連繫獄者三百人力爲平反殲渠魁三人餘胥釋
請革陝西茶馬累以蘇蜀民遷江西布政使鈐藩印簿二偕州
縣各執其一執簿兌驗吏胥皆拱手後以微愆去事白侯補遂
徜徉林泉以終子世仁仕至廣西左江道祀鄉賢

馮繼祖字昭武貢生授榆次訓導刊孝經說約諸錄徧給諸生諄諄以道義相期勉凡束脩來者收而籍之用以修葺廟學施給單寒改平定訓導課亦如之累舉鄉飲大賓所著見著述考王懋官字克廣順治戊戌進士授歸德府推官有膽識己丑庚寅間土寇竊發偕同知徐延議城守事城獲全及蒞理刑案牘山積剖決如流胥吏無敢舞文者尤嗜商略文事二載以疾歸士民懷之祀鄉賢

王士俊字龍任少以武勇著順治初餘寇未殄郡同知徐公祚煥委練鄉兵單騎入賊壘招撫賊賊脅俊降俊不屈遂遇害

陳顯字慷慨有志節明大義自幼善泅水順治六年土寇圍州城顯字不避艱險從水門出潛汾水中行數十里往平陽請兵殺賊城賴以安

新絳縣志

卷四

名賢傳

一二十五

閻調鼎字伯梅順治己亥進士任江寧推官清正廉明政績不著裁缺歸里披覽典籍後學多所造就焉

張鳳翼字天翔順治丁酉經魁任保德州學正捐俸修廟學陞延長令潔已愛物吏畏民懷

趙世福字魯齋順治丁酉舉人任沁沂二州學正遷星子知縣兼管南康九江二衛屯田事務均差役修城垣嚴禁溺女月課白鹿洞書院諸生廩給之

李璿字玉衡順治辛丑武進士授專城守備遷汀州右營守備

時有掠人婦女監諸空室者璿多方保釋諭其家使各引還居民皆感其義

閻如珪字錫侯康熙癸卯舉人庚戌進士授廣東徐聞令以廉能課最陞邳州知州所著見著述考

許啓芳字馨如康熙庚戌武進士授天津衛屯田守備陞沿河參將歷甘肅撫標左營副將捐俸修文廟設義學延師訓課士風以振歲荒申請賑恤減賦緩征乙酉從征噶爾丹報捷叙功第一去之日士民泣送不絕

楊作禎字翰臣號端齋幼從父園肄業於姑射山讀孝經始於事親終於事君遂感激曰士君子立身要必從此着脚康熙壬子

新絳縣志

卷四

名賢傳

一二十六

解元丙辰進士歷官右春坊右贊善淡泊自甘公餘杜門誦讀不妄交無私謁任事剛決不阿權貴纂修工部會典閱批遼金二史校正資治通鑑俱稱職己未會試分闈公明服人里居時置學田以贍貧士立社倉以恤鄉族桑梓賴之祀鄉賢

吳道煥字允公康熙己未進士少孤事母孝家貧好學與兄道昌相師友任貴筑知縣革積弊判疑獄陞戶部督寶泉局清操如故尋遷員外賜緞疋又書朱子詩賜之聞喜張拘齋誌其墓

張念祖恩貢貞教之孫性至孝授建寧同判廉明公正時賦逆牙將喬正庫踞建寧恣睢尤甚因治博徒而杖其僕正庫訴逆藩念祖曰藩下例不得居境外正庫胡爲在吾土境不爲屈

段炳然字七襄幼失怙事祖母繼母以孝聞捐田一成積穀備賑由例貢授泉州通判值靖逆海寇之變大軍雲集轉餉無滯賊平以軍功陞大理寺寺副因兩世親老乞終養歸建文式書院延進士閣調鼎主講成就尤衆祀鄉賢

李凝祚字亦聖歲貢任壽陽訓導克勤師職遷昌黎知縣民愛戴之解組歸行李蕭然色養二親友愛兄弟闕別墅爲義塾集里中貧子弟躬訓課焉

康善述廩貢任太谷教諭遷東陽春知縣陞磁州歷建寧同知當道以廉能薦因病告歸

張不猷字允升號屏翰康熙辛未武進士授蘭州衛守備時用兵

新絳縣志

卷四

名賢傳

一二十七

哈密兼值歲荒調劑轉運心力俱勞有聯云常念民間疾苦須要爲父母者替他周旋莫思自己身家當思做秀才時甘我淡泊因逸盜罣誤軍民各詣院憲保留例弗許衆哀籲益力數日不散乃允俟賑荒運餉事竣解任次年歸泣送如失父母亘數百里里居杜門謝客惟與二三知己賦詩論古徜徉以終焉許履亨字殿枝幼隨伯父啓芳陝西任習韜略勇力絕人中康熙乙未探花選一等待衛扈從至熱河暴卒識者惜之

梁萬稷字翼菴庠生雍正丁未舉賢良方正授衡水知縣拯水災清積逋遷天津通判陞承德直隸州決判如流先是州有截殺重案眞盜逸不獲誣指董偉董秀坐大辟萬稷廉其寃遽釋之

歷定州陞廣西太平知府

黃 洽字融之號鏡堂周莊人由翰林官湖南衡州府權衡永郴桂道其初之衡也僕從二三人隨帶小箱一具或訝之曰豪侈者必貪吾以清其源也嘉慶庚午秋闈監試內廉關防嚴密積弊一清時有副考官家丁干求不遂乘間行刺傷其臂不稍動試竣奏聞置諸法由是直聲益著官衡五載潔已率下力裁一切陋規復修建石鼓書院及青草橋士民戴之歿後輿櫬旋里鄉民泣送者自衡抵長沙不絕於道

張三銓字掌卿吉莊人父宏統介休縣訓導幼穎悟年十五以童子試於州補弟子員光緒癸巳舉於鄉戊戌成進士以知縣籤

新絳縣志

卷四

名賢傳

一二十八

分河南任鄆陵郟縣二縣以勞得知府銜公爲治相其俗而施政不泥一迹鄆民謹愿則崇教化以養其真郟多盜則參之武猛而亦不至於酷烈公在郟時政績尤著值歲歉民饑乃設平糶法購米者往來日數百人公日日躬監之一日忽執一人而詰之曰汝昨日甫購米今胡來其人俯首赧然去其治事明察皆此類也以故鄰民愛公尤深公旣去乃爲之立祠民國成立復爲夏邑縣知事年四十九歲卒於汴梁客舍所著書稿俱藏於家

名宦傳

牧令者親民之官也漢宣帝曰與我共治天下者其惟良吏二千石乎故其時政平訟理蔚成中興如黃霸龔遂王成朱邑之徒千載下談吏治者有餘羨焉絳爲三晉名郡來守是邦者往往治績卓異繫人愛思詳其治蹟爲後令尹告亦輯邑乘者所有事作名宦傳

北魏

陸 凱字智君代人仕魏爲給事黃門侍郎在樞要十餘年以忠厚見稱出爲正平太守號爲良吏卒謚惠

西魏

新絳縣志

卷四

名宦傳

一

楊 欒正平高梁人少慷慨值爾朱榮亂以義烈聞拜伏波將軍後從孝武入關以功進爵爲侯後攻拔正平河北南汾二絳建州太寧諸城以欒行正平郡事復襲克東魏薛榮祖轉正平郡守威名大振凡鄰境據險自恃如司馬恭侯景之徒皆不戰自遁子襲封

泉 企孝武時爲東雍州刺史高歡專政孝武有西顧之心欲委企以山南之事乃除洛州刺史常州都督未幾孝武西遷歡率衆至潼關企遣其子元禮督鄉里五千人出太谷以禦之高歡不敢進梁魏興與洛州接壤表請內屬詔企爲行臺尙書以鎮之大行臺賀拔岳以企昔涖東雍爲吏民所懷乃表復爲刺史

詔許之

裴果字戎昭河東聞喜人少慷慨有志略周太祖曾使并州與果遇果知非常人密附焉永安末從軍討賊乘黃驄馬衣青袍每先登破敵時人號爲黃驄年少永熙中授河北郡守沙苑之役率宗黨歸西魏解玉壁圍摧鋒陷陣所向披靡除正平郡守正平果本郡也以威猛爲政百姓畏之盜賊屏息歷牧數州皆稱職卒謚質

王德代武川人雖不知書而斷決處分無以過之在州未幾百姓懷之卒謚獻

唐永性清廉家無蓄積世咸稱之

新絳縣志

卷四

名宦傳

一一

梁禦字善通其先安定人後因官北邊遂家於武川少好學長更好弓馬爲政舉大綱民庶稱焉卒謚武昭

劉亮中山人少倜儻有縱橫計略從賀拔岳西征常先登陷陣與諸將謀迎周太祖以勇敢見知爲時名將謀策多合機宜太祖曰卿文武兼資即孤之孔明也賜名亮封長廣郡公大統十年出爲東雍州勅史爲政清靜百姓安之在職三歲卒於州謚曰襄

達奚武字成興代人爲賀拔岳別將同翊戴周太祖廢帝元年以大將軍出鎮玉璧量地形勝立樂昌胡營新城三防齊將高苟子以千騎攻新城武邀擊之悉虜其衆周受禪拜柱國武成初

轉大宗伯封鄭國公齊將斛律敦侵汾絳武以萬騎禦之敦退武築柏壁城留開府權嚴薛羽生守之保定三年遷太保以三萬騎自東道與北道隋公楊忠期會晉陽武至平陽後期不進而忠已還齊將斛律明月遣武書乃班師天和三年轉太傅五年卒謚桓子震襲爵

北齊

慕容儼字恃德清都成安人隗之後也爾朱敗歸高祖以勳累遷安東將軍高涼太守東雍州刺史沙苑之敗西魏荊州刺史郭鸞率衆攻儼拒守二百餘日晝夜力戰大破鸞軍斬首三百餘級又擒西魏刺史郭他時諸州多有翻陷唯儼獲全晉號鎮南將軍武定三年從攻玉璧賜帛七百匹并衣帽等齊天統二年別封猗氏縣公五年晉義安王武平中卒

新絳縣志

卷四

名宦傳

三

傅 伏武平六年爲東雍州刺史七年爲行臺石僕射齊敗惟伏不下先是周主之擒尉相貴也招之不從既克并州復遣韋孝寬招之令其子以上大將軍武卿公告身及金瑪瑙貳酒鐘賜伏爲信伏不受謂孝寬曰事君無貳此兒爲臣不能竭忠爲子不能盡孝人所讐疾願速斬以令天下及聞高緯被擒乃降引使宿衛授上儀同大將軍

北周

韋叔裕字孝寬京兆杜陵人少以字行沈敏和正涉獵經史大統

六年爲晉州刺史尋移鎮玉璧兼攝南汾州事先是山胡恃險屢爲劫盜孝寬示以威信州境肅然進授大都督十二年齊神武領山東之衆志圖西入以玉璧衝要先命攻之連營數十里至於城下盡攻擊之術孝寬咸拒破之神武無如之何乃遣倉曹參軍祖孝徵謂曰未聞救兵何不降孝寬報云我城池嚴固兵食有餘攻者自勞守者常逸孝寬關西男子必不爲降將軍也孝寬弟子遷先在山東又鎖至城下臨以白刃云若不早降便以大戮孝寬慷慨激揚略無顧意士卒莫不感勵神武苦戰六旬傷及病死者十四五智力俱困因而發疾其夜遁去後因此忿恚遂殂魏文帝嘉孝寬功令殿中尙書長孫紹遠左丞王

悅至玉璧勞問授驃騎大將軍開府儀同三司晉爵建忠郡公廢帝二年入爲雍州刺史恭帝二年周文北巡命還鎮玉璧周孝閔帝初入爲小司徒保定初以孝寬立勳玉璧遂於玉璧置勳州仍授勳州刺史孝寬善於撫御能得人心所遣間諜入齊者皆爲盡力亦有齊人得孝寬金貨遙通書疏故齊動靜周朝皆先知時有主帥許盆孝寬託以心膂令守一戍盆乃以城東入孝寬怒遣謀取之俄而斬首而還其能致物情如此汾州之北離石以南悉賊抄掠居人阻斷河路孝寬深患之而地入於齊無方誅翦欲當其要處置一大城乃於河西徵役徒十萬甲士百人遣開府姚岳監築之岳色懼以兵少爲難孝寬曰計成

此城十日即畢既去晉州四百餘里一日創手二日僞境始知
設令晉州徵兵二日方集謀議之間自稽三日計其軍行二日
不到我之城隍足得辦矣乃令築之齊人果至南首疑有大軍
仍停留不進其夜又令汾水以南傍介山稷山諸村所在縱火
齊人謂是軍營遂收兵自固版築克就卒如其言後武帝志在
平齊孝寬上疏陳三策書奏武帝遣使重幣聘齊後遂大舉再
駕而定山東卒如孝寬之策五年帝東伐過幸玉壁觀禦敵衆
之所深歎羨之移時乃去孝寬請爲先驅帝以玉壁要衝非孝
寬無以鎮之乃不許及趙王招率兵出稽胡與犄角乃勅孝寬
爲行軍總管圍守華谷以應接之孝寬克其四城武帝平晉州

新絳縣志

卷四

名宦傳

五

復令孝寬還舊鎮及帝凱還復幸玉壁詔孝寬隨駕還京晉上
柱國大象二年平相州還十一月卒謚襄

裴文舉字道裕聞喜人父邃任正平廉約自守每行春省俗單車
而已文舉少忠謹涉獵經史爲絳州利史一遵父政務以德化
民總管韋孝寬特相欽重每與談論不覺膝前於席天和初晉
驃騎大將軍開府儀同三司尋爲孝寬柱國府司馬

隋

韋世康京兆杜陵人孝寬兒子也父曼養高不仕世康幼而沉毅
仕魏封漢安縣公後從周武帝平齊授司州總管長史時東夏
初定世康緩撫之士民皆悅尉遲迥之亂高祖謂世康曰汾絳

周齊分界因此亂階恐生搖動今以委公善爲吾守因授絳州刺史以雅望鎮之闔境肅清世康性恬素好古不以得喪干懷在任有惠政奏課連最擢爲禮部尙書轉吏部選用平允請託不行後再拜陳讓願乞骸骨上不許尋卒贈大將軍謚曰文

梁

軌字世譽開皇初以內軍將軍爲臨汾令

古臨汾即正平郡

臨汾民

病鹵生物瘠疲因鑿山源開鼓堆泉十二渠溉田五百餘頃利甚溥民歌頌之爲立祠

按州志梁軌有功水利於今爲烈而府志梁後有范軌省志梁後有張軌姓異名同而事跡略同類意范軌張軌疑即梁軌歟

新絳縣志

卷四

名宦傳

六

陳叔達字子總陳宣帝子隋大業中爲絳郡通守受學於文中子叔達下捕賊之令曰無急也請自新者原之以觀其後文中子聞之曰陳守可與言政矣文中子嘗在絳出於野遇叔達曰夫子何之文中子曰將之夏叔達令勸吏息役董常聞之曰吾知夫子行國矣未嘗虛行也叔達嘗謂薛收曰吾行令於郡縣而盜不止夫子居於鄉里而爭者息何也收曰此以言化彼以心化叔達曰吾過矣退而靜居三月盜賊出境文中子聞之曰收善言叔達善聽後仕唐爲黃門侍郎判納言王凝嘗以文中子傳屬之卒謚忠

李安遠夏州人大業末補正平令時唐主兵起攻絳州安遠與通

守陳叔達嬰城拒守唐公子素與安遠善及拔絳撫慰其家乃與同食授右翊衛統軍正平縣公

唐

李元禮高祖第十子善騎射始王鄭即授鄭州刺史貞觀十七年徙王徐遷徐州都督爲絳州刺史有善政璽書勞勉賜以錦綵實封至千戶永徽四年加司徒兼潞州刺史咸亨三年卒

李元懿高祖第十三子封滕王貞觀十年改封鄭王歷潞州刺史總章中累授絳州刺史數斷大獄甚平允高宗嘉之璽書褒美賜物三百段咸亨四年卒謚惠

韓思復字紹出京兆長安人長山縣男倫孫舉秀才高第襲祖封

新絳縣志

卷四

名宦傳

七

爲刺史治行名天下開元中歷絳州拜黃門侍郎元宗北巡爲行在巡問賑給大使遷御史大夫進伯卒謚文上親題其碑曰有唐忠孝韓長山之墓

嚴挺之天寶間爲絳州刺史明皇欲進用李林甫忌嫉之因招挺之弟損之佯與叙故舊云當以子爲員外郎又云朝廷待賢兄極深須作一計入京既見當有大用令損之取絳郡一狀云少
有風氣乞入京師就醫林甫持狀奏云挺之年高近患風氣且授一閒官明皇歎咤久之林甫奏授員外詹事便令東京養疾
郭子儀肅宗寶應初絳州素無積儲歲飢糧賜不充軍士嗟怨突
將王元振作亂殺行營都統李國貞大肆擄掠朝廷憂其與太

原亂軍合乃以汾陽王子儀知朔方河中等節度行營副元帥發京師絹四萬疋布五萬端米六萬石以給絳軍初李國貞治軍嚴將士不樂皆思子儀元振因之作亂子儀至元振自以爲功子儀曰汝臨賊境輒害主將若賊乘其釁無絳州矣吾爲宰相豈受一卒之私耶收元振及其同謀四十餘人皆殺之自是河東諸軍皆奉法

于知微字辨機京兆萬年人志寧孫也累官蒲晉二州刺史長安二年改授絳州刺史州管軍府戶多彫散知微隨方撫馭應時而理奸盜出境流亡復業遷太僕少卿封東海郡侯景雲二年進公卒姚崇爲撰碑

新絳縣志

卷四

名宦傳

八

韋陟字殷卿京兆萬年人安石子襲郇國公肅宗即位起吳郡太守欲以爲相使者趣未至疑有顧望意止除御史大夫杜甫論房瑄詞意迂緩陟言其不失諫臣體王去榮殺縣令帝欲宥之陟謂非宜時拜吏部尙書久之宗人伐墓柏坐不相教貶絳州刺史陟早有名而爲林甫國忠擯廢及肅宗擇相自謂必得以後至不用任事新進皆望風憚之多言其驕倨及入關又不許之京師鬱鬱不得志以疾卒自書陟字名五朶雲時人慕之號郇公五雲體絳州有遺愛碑

李栖筠字貞一趙人幼孤有遠度莊重寡言舉進士調尉氏主簿歷改河南令李光弼守河陽高其才引爲行軍司馬兼糧料使

至德中改絳州刺史擢給事中累遷御史大夫封贊皇縣子卒
謚文獻

蘇 震雍州武功人瓌孫誥子疆學有成人風伯父頹曰吾家有
子至德中累拜文部侍郎從廣平王平長安後爲絳州刺史以
勞封岐國公終太常卿贈禮部尙書

李 憲晟次子仁孝喜儒以理法自矜初調太原府參軍事歷遷
絳州刺史絳有幻人怵民以亂憲執誅之河中兵本仰食於絳
而汾可輸河渭歲租與糴常數十萬石憲濱汾相地治新倉當
費二百萬請留垣縣粟糴河南以錢還糴絳粟旣免負載勞又
權其贏以完新倉絳人利賴之卒謚武兄愿亦爲河中晉絳節

新絳縣志

卷四

名宦傳

九

度使

盧元輔字子望宰相盧杞子以清行聞擢進士歷絳州刺史課最
召授吏部郎中進兵部侍郎卒端靜介正人不以杞之惡爲累
云

韋 武萬年人少孤年十一廕補右千牛累遷長安丞德宗幸梁
州委妻子奔行在除殿中侍御史戶部侍郎轉刑部員外郎是
時帝以反正告郊廟大兵後典章未究執事者時時咨武武酌
宜約用得禮之中羣司奉焉德宗朝爲絳州刺史鑿汾水灌田
萬三千餘頃璽書嘉勞憲宗時入爲京兆尹卒贈吏部尙書

杜黃裳字遵素京兆萬年人擢進士元和中爲晉絳節度使達權

變有大略性恬淡後平蜀擒劉闢以功拜平章封邠國公

李 漢少事韓愈通古學屬辭雄蔚爲人剛正略類愈愈愛重以子妻之擢進士第以御史中丞吏部侍郎坐牛李黨改絳州司馬詔有司二十年不得用不數年徙絳州刺史

楊 損字子默家新昌里於路岩第接岩方爲相欲易其廐以廣第損族仕者十餘人議曰家世盛衰繫權者喜怒不可拒損曰今尺寸土皆先人遺非吾等所有可奉權臣耶窮達命也卒不與岩不悅使損按獄黔中踰年還三遷絳州刺史

張 圓字直之河南偃氏人以河東從事後攝絳州能聞朝廷卒於汴韓愈作墓銘

新絳縣志

卷四

名宦傳

十

樊宗師字紹述蒲州人擢軍謀宏遠科爲絳州刺史有治聲家本饒悉散戚黨進諫議大夫有文譽作絳居園池記

張廷蘊開封襄邑人事晉遷軍校李繼韜叛於潞州爲馬步軍都指揮使將兵馬前鋒至潞日已暮即率兵百餘踰濠登城城守者不能禦遂破潞州明日明宗與元行欽後至明宗心頗慊之後歷絳州防禦使卒廷蘊素廉歷七州家無餘貲

陸 辰字祥文陝州人光啟二年進士判絳州嗜學有才思鄭從讜寓絳州與之談宴無間先後稱之於朝位至清顯歷同平章事再當國罷遇害於白馬驛

宋

錢惟濟知絳州有強奪民條桑者不能得乃自斫其右臂誣以陷人惟濟引問面給以食盜以左手舉筋因語之曰他人行刃則上重下輕今下重上輕正用左手傷右臂也誣者引服

李垂字舜工明道中知絳州修夫子廟還朝閣門祇候李康伯謁之因謂曰舜工文學議論稱於天下諸公欲用爲知制誥但宰相以未曾相識盍一往見之垂曰我若昔謁丁崖州則乾興初已爲翰林學士矣今已老大焉能趨炎附熱看人眉睫以冀推挽乎執政惡之出知均州

呂夷簡字坦夫壽州人蒙正弟子第進士補絳州推官天聖中參知政事拜同平章事封許國公夷簡於天下事屈伸舒卷動有

新絳縣志

卷四

名宦傳

十一

操術卒謚文靖

富弼字彥國河南人舉茂才異等初以將作監丞關決絳郡多美績士民至今懷之有祠

張昇字杲鄉韓城人第進士以母老求知絳州忠謹清直仁宗嘗謂爲孤立云卒謚康節

宋敏求字次道賜進士及第神宗初知絳州後加龍圖閣學士嘗建言河北陝西河東舉子性朴茂而詞藻不工故登第者少請令轉運司擇薦有行藝材武者特官之使人才參用而士有可進之路又州郡有學舍無學官故士輕去鄉里以求師請置學官後頗施行之

朱壽昌字康叔天長人天性孝友以將作監承關決絳州多著美績

謝 皓字商老入大學與游權老龔吉老齊名時人目爲三老元豐中第進士歷金部郎官遷司農少卿出守絳州以公廉稱

金

范承吉字寵之進士初從宗翰克宋翰所得金使承吉司其出入無毫髮欺及還犢車載書史而已擢知絳州先是軍興民有爲將士所掠而逃歸者承吉遍諭俾其自實凡數千人具白元帥府許自贖爲良或貧無貲者以公厨代輸改河東北路轉運使時民賦重承吉經畫立法簡便官民咸足

新絳縣志

卷四

名宦傳

十一

高汝礪金城人大定中進士爲石絳二州刺史有政聲人謂政事文學可比樊宗師富鄭公焉後相宣宗號爲良相

郭 通亳州人大定初擢陝西路轉運司都勾判官時晉絳戶稅轉輸平涼通監視之官吏無敢秋毫犯二州民舉手加額後爲絳陽軍節度副使父老咸曰此昔平涼閔恤我曹者也再期年大治絳人繪像於天甯寺舍立石紀德終清河防禦使

納蘭胡魯刺大名路怕魯歡猛安人寡言笑好讀書承安二年進士第一除應奉翰林文字貞祐中遷絳陽軍節度使權河東南路宣撫副使是時兵興胡魯刺完城郭繕器械料才壯爲鄉兵延問耆老招致儒士次以備禦之策鹽米儲備勸富民出粟郡

賴以完賜詔褒諭加資善大夫官其次子吾申改權經略使被
召以疾不能行卒於絳州

元

鐵連乃蠻人居絳州祖伯不花爲宗王拔都王傅鐵連魁偉寡
言有謀略早歲宿衛王府拔都分地在平陽以鐵連監隰州中
統初調平陽馬步站達魯花赤至元初宗王海都叛鐵連始終
四往返歷十四年上賞勅所受海都皮服二襲全飾以金朝會
服之以表示焉又謂鐵連曰朝官之要重者惟汝所擇對曰臣
志在王室今於王室未有裨益不敢奉命但臣母在絳州老且
病得侍朝夕幸也詔從其請授絳州達魯花赤十五年平陽李

新絳縣志

卷四

名宦傳

十三

一二謀亂捕問之盡得其狀中書奏進秩上曰鐵連豈惟能辦此
耶加宣武將軍十八年卒於官年六十四子答刺帶嗣官信武
將軍同知大同路達魯花赤

程元直亳州人知交城勸農興學政平訟簡人心悅服陞知絳州
明

顧登洪武十年知絳州建祀壇葺學宮修治廨規制悉備

王汝績江西金谿人宣德間以舉人知絳州躬歷隴畝勸農桑課
勤惰不數年土田悉懇大葺孔子廟修舉學政子弟雖愚懇懇
誨之不倦旁邑民間以事至亦必教以敦本節用凡有徵集第
書片紙付里甲悉踴躍樂赴無敢後者俗舊好鬪不勝輒輕生

親屬厚誣必致破產乃已嚴禁之有自斃者概不受理却盜出其途能先知即掩捕置之法在任九年訟息獄空教化大行當考績遽卒士民勒其政績於石

李 學河南祥符人正統四年知絳州公廉守法洞悉民隱所興舉咸得體要民肖像祀於羊舌廟

言 芳山東鄒平人成化六年以進士知絳州博學謹守居官清正衙舍蕭然幾可羅雀

劉 觀平度州人成化間知絳州廉勤威斷吏畏民懷居三年乞休獲請即單車就道循良之迹去就之義不愧古人

賈 定河南通許人成化間以進士知絳州通敏有吏才遇疑難

新絳縣志

卷七

名宦傳

十四

立剖決絳有屠人誘人出殺諸谷中歸而私其妻不從復殺之而搜其處女鬻他所以滅其迹事久弗白定廉得之論如法絳有積薪逋者破產糜家仍無以償定通一州丁戶足其數自是歲無逋者嘗立善惡二籍歲終覈實誅賞有差會大飢絳獨免因上救荒八事是年平垣曲盜規畫所及鄰境胥受賜後改易州尋陞山西按察司僉事

李守經汝陽舉人爲州學正以春秋授諸生人多傳誦焉

徐崇德山東濟甯州人洪治十二年以舉人知絳州置文廟祭器士林稱之

易 謨河南固始人正德九年以進士知絳州清而有爲熟悉民

間利害興除胥得其宜陞陝西西安府同知有去思碑民肖像
祀富鄭公祠

李文潔江西貴溪人正德十二年以舉人知絳州剛正明斷清操
凜然嘗興學校毀淫祠均賦役鋤豪強居四年風清弊絕陞建
寧府同知去之日民泣送如失慈母肖像祀富鄭公祠

錢 貢蘄水人嘉靖十年以舉人知絳州嚴明剛斷囹圄常空陞
廉州府同知

張文弼深州人嘉靖十七年以舉人知絳州慈祥忠厚平易近民
陞府同知累遷刑部郎中

彭 燦河南靈寶人嘉靖二十年以舉人知絳州有惠政陞臨洮
新絳縣志 卷四 名宦傳
十五
府同知累陞按察司副使

劉朝麒臨洮衛人嘉靖二十八年以舉人知絳州敦厚愛民剛果
執法絳有靈邱藩封招納無賴甚爲民害朝麒正其罪諸宗人
欲危之朝麒論以法乃解去陞廣德府同知轉按察司僉事

金 翮浙江樂清進士嘉靖三十二年以刑部郎中謫任同知有
清操署州數月興利除害聲動全晉州舊有牛頭遠赴瑞石驛
爲累滋甚申請折銀解納百姓便之詳見所著非非稿諸所節
省歲計數千金陞徽州府通判

黃 儒河南汝陽人嘉靖三十五年以舉人知絳州修南北城樓
邢 化山東臨邑人嘉靖四十三年以官生知絳州廉辨不爲刻

覈遇訟獄悉令白拘有以和息請者聽之弗徵贖緩學正李必昌南海人也與其妻並卒於任子女幼弱貧不能歸乃賻以百金擇老嫗及義民護送歸里陞延安府同知致仕

蕭 儼江南涇縣監生嘉靖四十三年以兵馬使謫任同知博學工文議論悉本經史舊例冬月汾川架橋板椿之徵歲以百計春夏水漲濟用舟楫橋置水濱板多遺失儼署篆命以舊板留用壞者易之不復徵銀後遂奉爲成法署臨汾臨晉兩邑俱有聲

張允濟固安人隆慶間進士以郎中出知絳州豐度威嚴不事鈎索人自不欺甫一年以艱去先是運司邊方兩處查盤計歲代

新絳縣志

卷四

名宦傳

十六

屯潞徭銀民多苦累允濟力請申豁方允半代去後仍全代如故歷陞僉都御史巡撫山東

米應昌浙江仁和人隆慶元年以進士知絳州州城濱汾常患水齧城應昌至築石堤護之清丈地糧杜絕飛詭公館供具悉以官辦司夜火夫照坊編派閭閻無擾民歌思之歷官右都御史屈大陞咸甯人隆慶六年以舉人知絳州馭吏以法撫民以寬建寅賓館沐愛坊

李遷喬安邱人萬歷四年以舉人知絳州清廉誠信卒於官士民哀之

敖得義湖廣竹谿人萬歷四年以歲貢任同知性和而介州人多

以產構訟牧委得義聽之惟理是直一無所徇陞南安府通判
和曲州知州

蔡楠沛縣人萬歷十年以歲貢任同知廉正不阿直指課吏將
示薄戒楠正色曰願聞可戒之狀既得其狀願置之理及理之
而白則拂衣去活民方藥遺愛尙存

劉庚山東壽光進士萬歷十三年以主事謫任同知先在南部
時以文涉時政遂左遷聲振中外時州守愎而奢以庚至乃稍
自戢庚所到輒題咏寓意忠愛不涉怨誹未幾以艱去歷陞浙
江按察司

尹鳳儀山東新泰人萬歷十四年以舉人知絳州值歲荒拮据焦
勞日無寧晷捐俸散賑全活甚衆

白璧陝西清澗人萬歷十八年以舉人知絳州酌汾灘荒地建
莊以便開墾人稱白家莊北關水路久湮力爲疏導人多德之
杜濬直隸任邱人萬歷十九年以舉人知絳州廉明能斷片言
折獄絳俗故輕生雖小忿輒自斃以累人濬嚴禁之有犯者悉
令自瘞俗爲一變與民休息不輕役一人不輕取一物無媿杜
母尋致仕歸

王大棟萬歷二十二年知絳州捐俸置學田建文昌閣

盧點萬歷二十八年知絳州清廉寬厚且有知人之鑒

范垠陝西郃陽人萬歷三十年以選貢知絳州恤民愛士法繩

吏胥公庭肅然

張繼東丹徒人萬歷三十二年以舉人知絳州慈祥愷悌用刑極簡青衿以寒苦告輒賑之不壓其瀆有古循吏風

方立誠太平人萬歷間以舉人知絳州文章政事雅思復古重修州志

朱正寅雲南人萬歷間以舉人知絳州才識明敏興利除害民資保障焉

笄繼良丹徒人知絳州崇尚理學惠愛士民臨行解所佩銀帶以爲修復河汾書院之需

雷 翀陝西郃陽人以舉人知絳州忠厚愷悌惠愛士民禱雨輒

新絳縣志

卷四

名宦傳

十八

應禳火反風立殲大豪爲民除害孫學謙第進士仕至監察御史

黨 琉陝西城固人知絳州賢能懋著卓有政聲

王 翰山東商河吏員判州事操守清潔法令嚴明兇頑斂跡

錢 適江南丹徒吏員爲州吏目有幹才善緝盜

邵 綰陝西富平吏員判州事緝盜安良民深感之

賀有敬直隸束鹿貢士判州事廉明善治盜

李初元四川劍州人判州事一錢不取署州篆甚得民後罷去遮道者千餘人右知州州判

清

陳維新奉天廣寧人啟心郎順治二年知絳州廉明誠愨愛民如子陞大名府知府陞巡撫

聶源直隸萬全衛人順治二年以舉人知絳州才識明敏判斷如流崇文課士振興學校

單惺直隸棗強人順治九年以舉人知絳州恭謹簡默旁竇盡杜陞工部員外

薛世望字山子湖廣江陵人順治十四年以貢士知絳州慈良愷悌士民愛戴館餼課士文風丕振

王琦字奇玉直隸大興人順治十六年以舉人知絳州政事詳明斷獄無滯秋闈分校號稱得士

新絳縣志

卷四

名宦傳

十九

劉顯第字澤遠奉天東寧人康熙二年以貢士知絳州有幹才百廢具興優禮士紳重修州志

蒲昌迪四川渠縣人康熙十七年以舉人知絳州廉惠明斷捐俸修學

劉涵直隸宣化府人康熙十九年由廕生知絳州飭廢弛抑奔競訟簡刑清門無私謁陞戶部員外郎

胡一俊直隸欒城人康熙二十八年由監生知絳州斷獄明決宵小屏息

萬國宣江西南城人雍正元年由監生知絳州廉幹明敏蒞任二年州改直隸更察院爲貢院改天主堂爲東雍書院陞歸德府

知府歷陞浙江按察司

顧開陸江南無錫人雍正七年以進士知絳州誠信待人不愧儒吏

童 紱直隸左衛籍浙江紹興人雍正十一年由監生知絳州才識明敏振興文教爲書院延師訓課成就頗衆

邵其德雲南保山人乾隆六年以翰林院庶吉士改外任方正廉潔一塵不染調任後行橐蕭然饋遺盡却臨行泣送者數百人

李 高山東高密人乾隆八年以進士知絳州慈惠廉正盡革行戶供應陋規催糧設立滾單民甚便之

段夢日江西樂平選貢判州事修建衙署歷署縣篆有政聲

新絳縣志

卷四

名宦傳

一十

張成德江蘇丹徒人乾隆十八年知絳州歷十餘載政簡刑清不煩不擾慨然以維持風化爲急因節孝祠湫隘囂塵無以光祀典捐廉移建棟宇一新重修州志搜輯靡遺士林稱之

張 濤順天副貢道光二年知絳州性仁慈獄囚多所全活修養濟院立城北義塚州人德之光緒四年呈請入名宦祠

李廷樟廣西陸川縣進士咸豐十年知絳州潔已愛民始下車即除投到討保吏胥勒索陋規因完糧加耗過多定九三銀以加三五爲準飭立碑永遠遵守時捻匪未靖公團練壯丁防堵津垣著有成績輯武經團鏡分頒各鄉又因州城頽圯守禦維艱諭民集資修葺越二年城牆俱已堅築陞平陽知府未幾捻匪

竄境城完可守民賴以無虞

陳世綸直隸青縣人己酉拔貢歷官榮河夏縣潞城萬泉陽曲等縣署忻州陞授絳州賞戴藍翎在任候補知府公才識明敏遇事有權略咸豐三年在籍辦團屢著戰績官榮河夏縣時均遭寇警公外禦內撫民賴以安光緒三四年間絳郡薦饑道殣相望公辦理賑務驅策羣力事必躬親不遑寢食孜孜懇懇半年如一日窮民保全甚衆而公竟積勞不起矣先是三界莊匪民乘機聚衆謀蠢動鄰近不逞之徒互相觀望勢將並起郡中一日數警公不動聲色集勇役掩捕之斬二人以徇餘黨分別遣散各村宵小聳懼或就擒或遠遁消弭巨變於指顧間而賑務

新絳縣志

卷四

名宦傳

一二十一

得以次第舉行歿之日州人感泣鳩資建祠以祀

李煥揚字劍秋河南鄭州人己酉拔貢光緒六七年間蒞絳時承大祿之後赤地千里公興養立教不遺餘力又設訓蒙義塾每月書院兩課之外特開登瀛文社公餘之暇親課諸士以故其時鄉試得捷者甚多兼捐寶輿以惠士減差徭以濟民實心實政有古循吏之風且續修絳州州志

錢榮增舉人光緒十三年蒞絳下車伊始甄別士類親閱試卷時刁頑之徒所在多有公以一嚴刑裁之豪猾斂跡縣當商務要衝城內向係土街一遇雨澤輒泥濘不利於行公易之以石交易稱便焉

儒 芳漢軍旗人以光緒二十七年蒞任時值拳匪亂後教案迭出公斷獄平允威惠並行民無怨言

朱善元字子欽錢塘人光緒三十一年蒞任時值學務改革之秋公創辦高等小學校兩處又即貢院遺址聯合稷河聞絳垣五縣創立全絳中校一處在任數年威惠並賜士民至今懷之

李 憲青城舉人爲州學正施教有方勤而無倦以禮經授諸生陞萊水知縣

馬 駙澄城舉人爲州訓導長於詩古訓迪有方

李守經汝陽舉人爲州學正以春秋授諸生人多傳誦焉

蔚 楷合肥人爲州學正規範嚴整雖私居必正冠垂紳

新絳縣志

卷四

名宦傳

一一二一

辛繼先襄城人爲州學正純朴間靜有古人風

賀 榮河南唐縣人學有本原爲學正講貫不輟評隲課藝妍媸不爽

李必昌廣東南海舉人工古文詞爲州學正延掌河東書院督率善誘諸生以得師爲慶陞修仁知縣未之任卒於絳士民哀之知州邢化爲經紀其喪

段邦寵陝西朝邑舉人剛斷明察庚午北闈同考時稱得人由州學陞國子學錄戶部主事

郝養民鄆州人爲州訓導忠誠愛士每月試躬爲督率

馬 繼直隸永年人爲州訓導講學論文諸生多負笈門下

張 軌鳳翔人惇信朴茂愛士如子由訓導陞教諭

郟永春修武人爲州學正恩撫諸生視猶子弟

黃一中黃岡舉人爲州學正好古能文纂修州志

曹樹聲會稽舉人爲州學正博雅工書從游甚衆

田毓華汴梁舉人爲州學正博學能詩推誠待士歷官滇南知府

陞南部郎中

白 澤綏德州舉人由州學正陞平遙知縣武畧特優擢安慶府

監軍同知

呂 偉靜樂人爲州訓導與貢士陶世徵增設配哲兩撫贊牌

史必遵孟縣拔貢爲州學正丰儀秀整識鑒精敏歷官國學部郎

新絳縣志

卷四

名宦傳

一二十三

陞湖廣衡州道

張世淳會稽舉人潞安府籍氣度寬和才思通敏詩效元白體與

多士相唱和任學正二十年陞平陽教授卒於絳爲桐鄉云

李調元蔚州舉人爲州學正增修祭器簿正祀典

程 珩長治歲貢爲州訓導才學優裕風雅歸之

程好生祁縣舉人爲州學正博學能文士楷式之

董 梅平定州舉人爲州學正工於詩文課士不倦從游甚衆

馬 嵩忻州舉人爲州學正制義清真忠誠待士

王 琰浮山廩貢乾隆七年爲訓導誠信無欺訓士有方

李朝陽平定州舉人風範嚴正羣士奉爲楷式

路步月字桂山清源縣舉人氣度寬和爲州學正課士不倦時值
學務改革之秋公又通新學提倡有方故成就後進之士甚衆
陳福臻字駢卿平陸縣舉人品端學優經術湛深時縣之初中各
校均已成立公兼膺各校經學國文教員一登講壇聽者忘倦
一時推爲醇儒

勘誤表

目別	頁數	行數	字數	誤	正
名賢傳	一	<small>面後</small> 八	三	厥起	起厥
同前	二	<small>面前</small> 六	三	謚宣子須	謚宣子
同前	六	<small>面後</small> 九	十五	援	授
同前	十八	<small>面後</small> 七	四	字	字
同前	二十五	<small>面前</small> 十	十五	涸	涸
名宦傳	二	<small>面後</small> 六	七	勅	刺
同前	五	<small>面後</small> 四	十五	利	刺
同前	六	<small>面前</small> 一	一	周齊	舊是周齊
同前	十六	<small>面後</small> 五	十	派	派

新絳縣志

卷四

勘誤表

一

